

- राज्य सरकार सगळा जिला कलेक्टरां अर चिकित्सा अधिकारियां ने मौसमी बीमारियां माथे काबू करण सारू असरदार कार्यवाही करण रा हुकम दीना।
- अन्तर्राष्ट्रीय बालिका दिवस रे मौके प्रदेश मांय न्यारा-न्यारा कार्यक्रम राख्थी ज्या।
- राज्य मांय दुर्गाष्टमी अर महानवमी परम्परागत सिरधाभाव सागे मनायी ज्यी-काल दशहरा रे मौके रावण रा पुतळा बाळ्या जावेला।
- मौसम विभाग आवता 3-4 दिन प्रदेश रा लंकाऊ हलका मांय बिरखा रा आसार जताया।

000

प्रदेश मांय मौसमी बीमारियां रा बधता मामलां माथे काबू करण सारू असरदार कार्यवाही करण रा हुकम दिया ज्या है। राज्य सरकार सगळा जिला कलेक्टर अर चिकित्सा अधिकारियां ने मरीजां री सार संभाल करण रा हुकम ई दीना है। अस्पतालां मांय आज-काल मोटी तादाद मांय डेंगू अर वायरल बुखार रा मामला आ रह्या है। लारला दस दिन मांय राज्य मांय डेंगू रा करीब एक हजार मामला सामी आ चुक्या है जद के आखा साल मांय हाल ताई करीब साढे 6 हजार मरीजां मांय डेंगू री बीमारी री ठा पड़ी है। लारला चार सप्ताह मांय डेंगू रा मामला री तादाद मांय लगातार बधोतरी व्ही है। जयपुर शहर रा केई हलकां मांय डेंगू रो कोप है। उदयपुर, बीकानेर, टोंक, अलवर अर दौसा मांय ई मोटी तादाद मांय डेंगू रा मामला सामी आ रह्या है। मलेरिया अर स्क्रब टाइफस रा मरीज ई मोटी तादाद मांय अस्पताल पूग रह्या है। स्क्रब टाइफस रा बत्ता मामला उदयपुर, अलवर, राजसमंद अर झालावाड़ जिला मांय सामी आ रह्या है। जयपुर रा सवाई मानसिंह मेडिकल कॉलेज मांय मेडिसिन विभाग रा वरिष्ठ आचार्य डॉ. प्रकाश केसवानी आकाशवाणी ने बतायो के ई दफा वायरल बुखार रा लक्षण मांय बदलाव आयो है।

000

मुख्यमंत्री भजनलाल शर्मा आज भरतपुर जिला रा बयाना मांय कैला देवी झील का बाड़ा मांय माता रा दर्शन कर र पूजा-अर्चना कीनी अर देश-प्रदेश मांय खुशहाली री कामना कीनी। मुख्यमंत्री आर.बी. एम. अस्पताल मांय नुवो भवन बणावण रो काम देख्यो अर अहलकारां ने जरूरी हुकम दीना। वे शहर मांय चाल रह्या विकास रा न्यारा-न्यारा काम ई देख्या। मुख्यमंत्री रो काल सर्किट हाउस मांय जन सुणवाई रो कार्यक्रम है।

000

लोकसभा अध्यक्ष ओम बिरला आज कोटा मांय जनसुणवाई कीनी। ई दौरान कोटा अर बून्दी रा गांवाई हलकां ऊं पूग्या जनता रा नुमाइन्दा ई बिरला ने मांग पाना सूंप्या। बून्दी मांय लक्ष्मीपुरा-डोरा-डाबी ताई सड़क बणावण सारू जंगलात महकमा री मंजूरी दिरावण परां कार्यकर्ता बिरला रो आभार जतायो।

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी जा रही है। इण मांय आज पेश है गिग अर प्लेटफॉर्म मजूरां ने सामाजिक सुरक्षा योजनावां रो फायदो देवण सारू केन्द्र सरकार कानी ऊं करी ज्या जतन री जाणकारी-

000

अन्तर्राष्ट्रीय बालिका दिवस रे मौके आज प्रदेश मांय न्यारा-न्यारा कार्यक्रम राख्थी ज्या। ओ दिवस टाबरियां री टाबरां सागे बराबरी, भणार्ई-लिखाई अर बराबरी रा मौका मुहैया करावण माथे जोर देवे है। ई साल अन्तर्राष्ट्रीय बालिका दिवस रो मुद्दो है - **भविष्य के प्रति बालिकाओं की संकल्प दृष्टि**। ई मौके पाली मांय टाबरियां बेटी बचाओ-बेटी पढ़ाओ टैगलाइन, लोगो अर अंतरराष्ट्रीय बालिका दिवस मण्डयोड़ो केक काट्यो। ई मौके बेटी बचाओ-बेटी पढ़ाओ शपथ बोर्ड माथे दस्तख्त ई करायी ज्या। कार्यक्रम मांय बेटी जणबा वाळी लुगाइयां रो पैली वाळा विधायक ज्ञानचंद पारख द्वारा मान कीनो। हनुमानगढ़ जिला रा टिब्बी रा राजकीय कस्तूरबा गांधी बालिका आवासीय विद्यालय मांय महाअष्टमी अर महानवमी रे मौके कन्या पूजन करी ज्यो। ई मौके टाबरियां ने वां रा हक, हिफाजत, मौसमी बीमारियां अर मानस अभियान रा बारा मांय जाणकारी दीरीजी अर नशो नी करण री सौगंध दिरायी ज्यी।

000

राज्य मांय आज नौरता री आठम अर नवमी रे मौके कन्या पूजन अर दूजा धार्मिक अनुष्ठान करी ज्या। **झालावाड़** मांय मुकुन्दरा री डूंगरियां मांय असनावर कने माँ रातादेवी, दूधा खेड़ी अर मिश्रौली रा माता जी रा मिंदरा मांय मोटी तादाद मांय जातरू पूग्या। वठे मेळा ई भर रह्या है। म्हाणा खबरनवीस बतायो के ज़िला मांय न्यारी-न्यारी ठौड़ा गरबा खेल्या जा रह्या है।

जयपुर मांय आमेर री शिला माता मिंदर मांय ई मोटी तादाद मांय जातरू पूग रह्या है। करौली ज़िला री नामी शक्तिपीठ कैला देवी मांय चाल रह्या मेळा मांय आज लाखों रा तादाद मांय जातरू पूग्या। **पाली** मांय बड़ी ब्रह्मपुरी मांय मां अम्बे रा मिंदर मांय महिलावां कळश अर वां माथे ज्योत जळा र गरबा कीना। **टोंक** रा सुभाष बाजार मांय कन्या पूजन रो कार्यक्रम राख्यी ज्यो। सवाईमाधोपुर ज़िला मांय ई माता ने खीर अर हलवा-पूरी रो भोग लगायी ज्यो अर कन्या पूजन रा कार्यक्रम राख्यी ज्यो। ज़िला रा ऐतिहासिक कंकाली माता मिंदर मांय खास सोहवणी झाँकी सजाई ज्यी। **जैसलमेर** मांय ई गजटेड हनुमान मिंदर मांय कन्या पूजन रो कार्यक्रम राख्यी ज्यो। **बाड़मेर** ज़िला रा वीरातरा मांय वाकल माता रो मेळो भर रह्यो है, जिण मांय मोटी तादाद मांय नुवा परण्या जोड़ा अर जातरू पूग्या। वठे कन्या पूजन रा कार्यक्रम ई राख्यी ज्यो। **बांसवाड़ा** री नामी शक्तिपीठ त्रिपुर सुंदरी मिंदर मांय मोटी तादाद मांय जातरू दर्शन सारू पूग्या। **श्रीगंगानगर** ज़िला रा न्यारा-न्यारा मिंदरां अर घरां मांय मां भवानी री खास पूजा अर्चना, हवन-यज्ञ अर कन्या पूजन रा कार्यक्रम राख्यी ज्यो। **सिरोही** ज़िला मांय ई न्यारा-न्यारा मिंदरां अर घरां मांय मां भवानी री खास पूजा-अर्चना अर हवन-यज्ञ रा कार्यक्रम राख्यी ज्यो। **शाहपुरा** जिला री नामी शक्तिपीठ धनोप माता मिंदर मांय ई आज मोटी तादाद मांय जातरू दर्शन कीना। **उदयपुर** रा मिंदरां मांय ई ई मौके खास धार्मिक कार्यक्रम अर कन्या पूजन रा कार्यक्रम राख्यी ज्यो। **चूरू** मांय आज दुर्गाष्टमी रे मौके कन्या पूजन करी ज्यो।

000

राज्य सरकार स्पिनफैड रा कर्मचारियां रा समायोजन पाछे संबंधित संस्था मांय लागू नियमित वेतनमान रो फायदो देवण रो फैसलो कीनो है। सहकारिता राज्य मंत्री गौतम कुमार दक आ जाणकारी दीनी। वे बतायो के सहकारिता महकमो ई बाबत् हुकम जारी कर दीना है। ई फैसला ऊं सहकारी संस्थावां मांय काम कर रह्या स्पिनफैड रा करीब 110 कर्मचारियां अर मजूरां ने फायदो मिलेला। सहकारिता मंत्री बतायो के स्पिनफैड रा कर्मचारी अर मजूर ज्यीं तारीख ऊं सहकारी संस्था मांय समायोजित ओहदा माथे काम सरू कीनो, वां तारीख ऊं दो साल ताई वां ने परिवीक्षाकाल मांय मान्या जावेला। अ दो साल पूरा व्ह्या पाछे कर्मचारियां ने संबंधित संस्था मांय लागू नियमित वेतनमान रो फायदो दियो जावेला। प्रदेश रा पाकिस्तान ऊं लाग्योड़ा सरहदी हलकां मांय टिड्डियां ऊं साखां ने व्हेवण वाळा नुकसाण माथे माथे काबू करण सारू आवता दिनां इटली रा रोम ऊं आवण वाळा जाणकार जैसलमेर ज़िला रो दौरा करेला। पेश है म्हाणा खबरनवीस री रपट-

000

प्रदेश मांय लारला 24 घंटां मांय कठे-कठे हल्की ऊं मझला दर्जा री बिरखा व्ही। बाड़मेर मांय सब ऊं बत्ती 23 मिलीमीटर बिरखा दर्ज करी ज्यी। दूजी कानी प्रदेश रा केई ज़िलां मांय पारो चढ़बा लाग्यो है। कुछ जिलां मांय दिन री बगत पारो 38 डिग्री सेल्सियस ने पार कर ग्यो जद केई ज़िलां मांय अधिकतम तापमान 32 ऊं 35 डिग्री सेल्सियस बीचे दर्ज कर्यो जा रह्यो है। मौसम विभाग आवता तीन-चार दिन प्रदेश रा लंकाऊ हलका मांय बादळा मण्ड्या रेहवण सागे बिरखा रा आसार जताया है।

000

राज्यपाल हरिभाऊ बागड़े काल मनाया जावण वाळा दशहरा रा पर्व रे मौके बधाई अर शुभकामनावां दीनी है। ई मौके राज्यपाल वां रा संदेश मांय कह्यो के अन्याय माथे न्याय री, झूठ माथे सांच री अर बुराई माथे अच्छाई री जीत रो ओ पावन पर्व इंसान ने अंदरूनी बुराइयां छोड़ र अच्छाइयां अपनापण री सीख देवे है। ई मौके कोटा रा राष्ट्रीय दशहरा मेला रा तहत काल 7 बज र 01 मिनट ऊं 7 बज र 31 मिनट बीचे रीत मुजब रावण रो 80 फीट ऊंचो पुतलो बाळ्यो जावेला।

000